

皇明大政紀

皇明大政紀卷之十二

臣豐城雷禮謹輯

餘姚朱錦謹校

金谿閔師孔謹訂

庚午。景泰元年正月。

上皇在迤北。

上皇在虜營。寫表祝天行十六拜禮也。先迎於斷頭山。

作年。請上皇幸其帳。宰馬設宴。

帝受朝免賀。

慧星見。

上皇書至。索大臣來迎。命公卿集議。廷臣因奏請遣官。

使北進冬衣有旨欲能識 上皇者行羣臣懼謝罪繳納
原奏事遂寢。

直內閣侍讀彭時乞終繼母喪不允忤 旨去。

御史練綱上安攘五事下所司議行之。

吏科都給事中林聰率六科十三道劾內侍單增罪惡令
下獄尋釋之。

時增恃寵驕縱勢日熾大臣有候其生日約結武弁持
賄拜賀其家如往年之事王振者故聰等劾之且曰復
起羣邪趨媚之風大開小人奔競之路乞急治之不然
必陷覆轍。帝覽疏卽命錦衣衛捕治之後雖獲釋然
不敢復肆矣。

命副都御史軒輓鎮守浙江兼理鹽課。

吏部文選司郎中李賢上正本十策。詔付外。給事中李侃等言李賢忠信宜賜覽納。命翰林繕置左右。

曰勤聖學。顧箴警戒嗜欲。絕玩好。慎舉措。崇節儉。畏天變。杜貴近。振士風。結民心。

御史朱英劾都督汪全恃戚畹縱家人奪民田。命歸田于民。

大同總兵郭登敗虜于栲栳山。

虜自屢勝以來。出入自由。未聞有出一兵拒之者。登不勝憤。晝夜拊循將士。激以忠義。定爲賞格。期必殺賊。忽報東驛賊入境。登率兵躡其蹤。行七十里至水頭。日已

暮休兵以覘之夜漏下二鼓報云二十里東西沙窩賊營十二皆自朔州搶掠而回者登召將士問計或言賊衆我寡莫若全軍而返爲善登曰我軍去城已百里若一退避人馬疲倦賊以鐵騎來追雖欲自全得乎卽按劒起曰敢言退者斬于是徑薄賊營天色漸明賊以數百騎迎戰登奮勇先行諸軍繼之呼聲震山谷登射中二人手刃一人遂大破其衆追奔四十里至栲栳山前後共斬首捕虜二百餘騎奪回被虜人口牛馬弓刀器械以萬計捷聞賜敕褒美

閏正月 上皇在迤北

京師烈風晝晦

敕大理寺丞薛瑄總督松藩糧餉。

命鎮朔大將軍石亨都督范廣率兵出大同宣府。

少保于謙諜知亡命小田兒爲虜謀雜虜使中來覘虛實奏授計侍郎王偉因使大同道誅之。

二月上皇在迤北。

侍讀劉定之上言十事上嘉納之。

一曰守禦言宜增兵士繕亭障塞蹊隧。一曰降胡言宜乘大兵聚集之際遷徙其衆遠居南土禁其種落不許自相婚媾變其衣服不許仍遵夷俗或以爲兵使與吾中國之兵部伍相雜以牽制之或以爲民使與吾中國之民里甲相錯以染化之庶可省全俸之給減漕輓之

勞。一曰練兵。言宜痛革月錢之弊。作新操練之政。一曰議政。言宜日御便殿。近臣侍于側。大臣奏于前。言官察其邪正。而加糾彈。史官書其言動。以示勸懲。陛下遵而行之。則決于萬幾也。益以熟察于百官也。益以明聖政益隆矣。其六事言戰陣。選將。選使。臣。選守令。重經筵教武。皆切時務。

兵科給事中葉盛言。八府旱蝗相加。加以虜寇侵擾。合賜寬恤。下部議行之。

令天下生員納粟上馬者。許入監。限一千人。其上選事例與歲貢同。

此納粟入監之始。以邊圉事急。不得已行之。

進直內閣侍郎苗象爲兵部尚書兼翰林學士

山西行都司天城衛令史賈斌上疏請法 太祖除去竊柄閣宦專備洒掃并上忠義集事下禮部尚書胡濙沮格之

斌集歷代直諫盡忠守節及恃寵宦官撮其尤者錄成四卷名曰忠義集伏乞刊布臣僚必能觀感以興起忠義之誠而宦者亦不能縱其奸宄之私矣事下禮部尚書胡濙覆奏謂斌言雖有理然 章皇帝御製臣鑑已行頒給足爲觀戒所編不必刊布且言斌擅白離役發回原籍

初開經筵 命太保寧陽侯陳懋知經筵事內閣陳循苗

秉高穀同知經筵事。江淵商輅及侍郎儀銘俞山俞綱祭酒蕭鉉侍讀學士劉鉉諭德趙琬皆經筵官進講。

是時每講畢。命中官撒金錢于地。令講官拾之。以爲恩典。時高穀年六十餘。俯仰不便。無所得。一講官常拾以貽之。識者病其褻嫺。

封大同守將郭登爲定襄伯。

贈前侍講劉球爲翰林院學士。諡忠愍。

球二子。長鈺。次鈺。皆好學。通春秋。痛父死于非命。皆杜門家居養母。絕意仕進。及王振馬順死。球被褻贈。時刑部侍郎楊寧巡撫江西。召二子慰勉之曰。先公忠義顯白。子可以出而仕矣。乃出應舉。鈺卽舉。是秋鄉試第一。

尋與兄鈇先後登進士。鈇仕至叅政。鈇選翰林庶吉士。改御史。陞浙江提學副使。雲南按察使。嗣世子孫科第。相仍。人謂天固所以報忠愍云。

吏部尚書王直奏罷三品以上京官各舉所知例。聽吏部自擢從之。

宣德初。學士楊士奇以方面大職。亦任吏部自舉。未盡得人。乃令在京三品以上官各舉所知。當時以爲美事。行之既久。公道者少。時人有拜官公朝受恩私室之譏。故奏罷之。

三月 上皇在迤北

壬戌。敕武清侯石亨會大同鎮守等官議戰守長策。或襲

營或設伏。或會兵剿殺。務在早爲處置。免致師老兵疲。財
匱用乏。不可輕率以墮其計。

丙寅。勅諭安南國王黎濬。將所擄占城國人口。依數放回。
本國彼此兩全和好。

戊辰。總兵官石亨言三事。俱從之。

一聞虜賊將犯大同。其巢穴在斷頭山。去寧夏不遠。請
調延綏官軍及洮岷等衛土軍。往寧夏隄備。仍敕寧夏
總兵等官。遣人覘探虛實。量率輕騎。直擣巢穴。則賊自
遁。一山西布政司原召募義勇。抽選馬步一萬七千。操
備守城。請量調大同各城協軍守備。一大同設左右叅
將副郭登。

勅工部尚書石璞往山西同右副都御史朱鑑等再募義勇調鴈門關操候亨調用。

叛臣喜寧伏誅。

寧懷二心素教也先擾邊且不欲送。上皇還京。上皇深惡之謂不誅寧還京未有期也寧又忌袁彬誘彬出營將殺之。上皇急救之乃免。及彬與上皇謀遣寧傳命入京令軍士高磐與俱密書繫磐解間令至宣府與總兵等官計擒之既至城下宣府叅將楊俊出與寧領書磐抱領大呼俊縱兵遂縛寧送京師誅之自寧既誅虜失其嚮導稍稍厭兵矣。

辛未北虜分道入寇。

也先與賽刊王分部諸酋入寇。自領人馬一萬七千寇大同陽和。大同王領人馬一千七百寇偏頭關。答兒卜花王領人馬一萬七千哨亂柴溝。鐵歌卜花王領人馬七千餘寇大同八里店。鐵歌平章領人馬七千圍天城。脫脫不花王領人馬寇野狐嶺并萬全。欲痛戰以償喜寧田達子之命。

壬申命戶部曉諭南北直隸山東山西河南富實人民有能出備粳米粟米料豆穀草禾草并馬驢牛送赴保定易州去處旌爲義民給冠帶。

癸酉國子監致仕祭酒李時勉上言請鑒前古之失。究今日之弊。留心政務。加意武備。并贈諡弔扈征死義諸臣。命

有司采用之。

命直內閣侍郎俞綱出理部事。

四月甲戌戶部等衙門尚書金濂等議胡寇犯邊大軍失利遺有馬營獨石龍門鵬鶚等處芻糧宜令督儲侍郎劉璉提督軍務副都御史羅通及宣府總兵朱謙遊擊楊能會計搬運宣府從之。

丙子少保兼兵部尚書于謙言六事。命內官不動餘俱議行之。

一議南京災異疊見乞敕重臣撫恤人民整飭軍馬嚴防奸細固守城池。一議開封南陽襄陽鳳陽兗州安插逃民數多乞敕巡撫都御史王來洪英尚書趙新善加

撫恤密切防閑一議各處公差鎮守等項內外臣乞減省軍民免煩擾一議各處調來官軍乞量加恩澤免致逃亡一議各營馬匹缺飼秣乞敕戶部取勘舊賜官員草場暫借一年或收草或牧放候邊事寧息仍歸所賜之人一議勅在京在外詳辨刑獄不許深文羅織。

巡撫河南副都御史王暹發兵擒妖言煽衆保定張普山于陳州誅之。

南京吏部尚書魏驥會法司因旱恤刑主決惡逆王剛翌日雨。

或以剛年少欲緩之驥曰此婦人之仁天道不時正爲此也遂決翌日而雨又戍卒四人牧馬三人互毆一人

死之。有司却拷訊三人內一人當之。驥曰：罪一人則情可矜，罪三人則律不合。宜上請。卒得旨：三人各杖一百，改戍邊城。

庚午，十三道御史羅篴等言：北京去冬無雪，今春不雨，狂風揚沙，陰霾蔽日。并南京大風拔木，洪水決河，及各處寇賊未寧，流移未復。乞上練兵、選將、親賢、遠姦、戒飭諸司廢弛等弊，命各衙門議行之。

六科給事中葉盛等言：四方多事，兩京降災，乞敕文武大臣及科道降秩停俸，俾得修省。命羣臣會議修省。

於是內閣陳循、苗衷、高穀及六部、都察院、通政司、大理寺、太常寺、太僕寺、鴻臚寺、光祿寺、欽天監、太醫院等衙

門堂上官各自陳不職乞加典刑。上悉宥之。

壬午翰林院編修周洪謨言十二事。詔羣臣會議采行之。

一察吏治以示勸懲。言每歲各處巡按御史乞差二員。其一畱守司。其一巡歷郡縣。一撫流民以防奸宄。言各處流民聽其遊食所到郡縣撥與荒閒田地任其耕種免徵稅糧。一興學校以惇風化。言各處提調學校僉事無督教之實乞裁革。及學官有缺不許監生充選。一慎科舉以求真才。言科目惟以得人爲要。不必鄉貫是拘。宜令遊學之士隨其所在卽許應試。一止苛歛以恤貧窮。言各處有司科歛民財或餽送上官或交通使客宜

加嚴禁。一均賦役以甦凋瘵。言四川所屬郡縣差徭不均。乞令每里各置一籍。專書戶口多寡。驗丁科派。一糾武職以足兵食。言各處武職或治產業宅第而私役軍丁。或貸錢以賂上司而償以軍糧。宜令巡按御史糾察嚴加降黜。一肅軍令以止劫奪。言各處征討軍士有沿途劫財害民者。乞許諸民殺死無論一謹防巡以禦寇賊。言各邊守堡軍士并巡檢縱放軍士弓兵致有賊盜之患。乞令巡按御史糾察治罪。一恤吏員以廣仁惠。言各處吏員兩考赴部。因文書差訛送問重律。自今乞皆停免。一革虛費以節民財。言各處驛傳什物極其華侈。及使臣往來多用馬匹并需索酒物。宜加禁泊。一設方

略以遏橫暴。言近歲四川夷民聚衆爲盜。今有行人劉瀚係本處人。深知山川險阻。諸曉方言。乞借一職。協同僉都御史李匡調度殺賊。

癸未。敕總兵石亨。今達賊分道入寇。決不可回京。其石彪所領官軍在彼日久。人賜銀五錢布一疋。于大同官庫給之。

都督董興等大破廣州賊黃蕭養。誅之。

初。楊信民爲廣東叅議。有惠政。恩信素孚於民。及爲都御史。巡撫至廣州。民爭歸之。信民發粟賑濟。民益喜。賊衆日散。旣而信民卒。興等率兵至。時天文生馮軾隨行。至中道。夜半聞雞鳴。興問之曰。此何祥也。對曰。雞不以

時鳴。由賞罰不明。願公嚴軍令。經清遠峽。有白魚入舟中。軾曰。昔者武王伐紂。有此徵。此逆賊授首之兆也。時蕭養聚舟河南。千餘艘。勢甚張。衆欲請益兵。軾曰。兵貴神速。若復請兵。則緩不及事。以所徵兩廣江西狼兵取勝。猶挫朽耳。興從之。三月初旬夜。有大星墜於河南岨。軾以所占告曰。四旬內破賊必矣。至是興率官軍至大洲頭。與賊遇。果大破之。蕭養中流矢被擒。伏誅。餘黨悉平。後封興海寧伯。

甲申。國子監致仕祭酒李時勉卒。遣官諭祭。謚文毅。

丁亥。敕諭保定伯梁瑤克總兵官都督同知方瑛克副總兵都督同知李友克左叅將兵部侍郎侯璉左都督毛福。

壽等俱總督軍務。統兵剿殺貴州苗賊。

先是巡按監察御史黃鎬等奏苗賊攻圍平越等衛日久。城中糧盡。官軍逃亡者九千餘人。存留者日食草根。餓殍危甚。靖遠伯王驥等但搖動軍聲。逗遛不進。乞勅驥等早爲進兵。以解孤城之危。章下。兵部議以驥老病。請別選總兵代之。故有是命。召驥還京。

雲南總兵官黔國公沐斌巡按御史左景等奏。緬甸宣慰司兩次遣使七十四人。貢方物金銀。曩刀金銀。鑄馴象象牙。西洋布等件。欲請朝廷調兵剿殺賊子。思機發緣貴州苗賊生發。東西路梗。屯堡驛舍俱被燒燬。無人接遞。乞將方物暫於布政司收貯。着令來使回還。止留二十人聽候。

平定日類進禮部尚書胡濙言前項方物不畱珍禽奇獸難便拒却以阻遠人來貢之心宜令總兵等官盡畱其來使待賊情寧息卽便起送從之。

辛卯大同叅將許貴奏欲遣使議和以緩虜兵徐爲討伐計兵部尚書于謙議無輕遣使以取侮從之。

謙謂去冬嘗遣都指揮李鐸指揮岳謙往使財賂方入穹廬虜騎已至關口繼遣少卿王榮通政王復又往不見上皇鑾輿而還朝廷灼見虜情譎詐和不足恃以故絕使不與往還惟勅邊將修武備勵人心固城池相機守戰今貴又倡和議之說臣竊謂今日之事理與勢皆不可和何者中國與寇虜有不共戴天之讐則背君

父而違大義此理之不可和也醜虜貪而多詐萬一和議既行而彼有無厭之求非分之求從之則不可違之則速變此勢之不可和也苟以爲虜強難治姑從和以緩其兵臣請質之前宋澶淵之役契丹屢爲我兵推沮旣盟之後朝廷常歲輸銀絹三十萬迨徽欽北狩中國名將如張韓劉岳之徒屢敗金師及奸臣秦檜一主和議旣割土以與之又輸幣以賂之甚則降去尊號其含垢忍耻屈以圖和無所不至卒之人心解體國勢陵夷援古證今和議之不足恃也明矣爲今之計莫若選將練兵養威畜銳

甲午鎮守浙江都御史軒輶奏福建政和賊首吳金八等

流劫青田縣。攻圍平陽千戶所。議遣布政使孫原貞僉事
鄭彥譽尅期會剿。從之。

丙申。提督懷來宣府軍務副都御史羅通奏乞還京。詔
還報未絕。不可輕動。

虜攻鴈門關等處。兵部尚書于謙議。救總兵官石亨等量
調精兵。與都御史朱鑑尅期夾攻。仍敕延綏總兵官委智
勇善戰臣領兵渡河。于保德州設伏截殺。從之。

巡按貴州御史周文泰蠻賊并白羅羅土僚等蠻屢攻畢
節赤水永寧普市衛及各千戶所。城池驛站屯堡俱被燒
劫。危在旦夕。乞調兵運餉拯之。命遣人促總兵梁瑄兼
程往除民患。

鎮守浙江太監李德言錦衣衛指揮馬順長隨內侍王遺等罪犯深重亦宜取斷。聖衷各官乃肆奸宄卽于御前捶死。變祖宗法度此正賊臣犯闕不宜任用事下少保于謙等議今日之禍皆由王振馬順等猶懷黨比擅致呵叱正李德所謂罪犯深重者文武羣臣憤激捶死亦是春秋誅亂臣賊子之義。

上曰誅亂臣所以衛國安民馬順等皆王振奸黨文武羣臣捶死之俱忠義心朕已知之李德所言卿等其亦置之。

裁革各省提督學校憲臣

丁酉勅宣府總兵官朱謙遊擊將軍楊能等得奏達賊三

百餘騎入石峰口。燒燬關門。尋由故道出境爾。罪當究。但
今用人姑從寬釋。爾其同心戮力。勉圖後效。如畏縮坐視。
縱賊殃民。必殺不宥。

己亥。少保于謙奏遣都指揮陳旺。石端王信。王竑等分兵
防守涿鹿。真定。保定。易州等處。仍聽右都督楊俊節制。
敕都督同知劉安鎮守易州等處。陞大理寺少卿陳恭爲
右僉都御史。叅贊軍務。

癸卯。河南道御史程昊請 上法 祖勤政。遇有軍國重
務。卽召保傅。總兵。執政。文武重臣及翰林儒碩。同至便殿
計議。親賜裁決施行。 上嘉納之。

五月。 上皇在迤北。

甲申。戶部尚書金濂奏保定易州涿州糧不給。請差郎中一員將河南山東等處運到民糧并直隸鳳陽等處民運糧內共撥一十五萬石。自丁字沽進直抵雄縣諸處。令軍民官司設法。每處運五萬石收貯備用。從之。

少保于謙言。五軍中軍操旗軍頭撥月支口糧五斗。二撥四斗五升。三撥四斗。近于河南等都司北南直隸大河等衛所調來操備者。頭撥止給四斗。二撥三撥又減其五升。乞一體支給爲便。從之。

乙巳。巡撫山西都御史朱鑑奏。達賊分道入寇。請以隣近關隘守將分委地方策應。責有所歸。從之。

河曲保德州岢嵐宜令偏頭關策應。寧化靜樂忻州定

襄太原清源交城文水宜令山西策應五臺繁峙崞縣
宜令鴈門關策應其石州寧鄉宜令汾州及守備千戶
所調軍協守。

總兵官石亨奏達賊六萬攻圍代州官軍出戰射殺一百
八十人卽今南侵腹裏上命兵部促易州等處守備官
軍啟行人賜絹布各一疋仍勅總兵官劉安及沿邊鎮守
等官相機戰守策應。

戊申總兵官石亨奏達賊營鴈門關一路恐侵京師下廷
臣議黃花鎮鞞口外衛西北邊境內護陵寢京師宜益
兵守備從之仍令兵部稽在京軍馬數以聞。

己酉山西靜樂縣奏報達賊殺擄男婦八十一口牛馬驢

騾一百四十餘匹。羊六百八十二隻。

庚戌鎮守臨清等處平江伯陳豫奏乞將山東各布政司并北直隸強賊及三犯竊盜脅力過人者。不爲常例。俱發口外總兵官處殺賊一人。免其本罪。二人以上。如例陞賞。若退怯者。卽斬以徇。不從。

辛亥鎮守真定都御史陸矩奏定州阜平并倒馬關舊路嶺多屯軍馬糧不給。下戶部議。發臨清糧三萬石于三處均收備用。從之。

運至阜平者每石給牌米五斗。運至倒馬者四斗。定州者三斗。

遼賊寇宣府。總兵都督朱謙等率兵力戰却之。

官軍陣亡者百四十人。都督江福等率兵應援。又爲賊所敗。殺傷百餘人。

壬子。巡按河南御史程昊劾賊掠薊州諸處。遊擊將軍楊能。叅將楊俊不能禦賊。掠懷來等處。都督范廣不能禦賊。入野狐嶺。叅將紀廣合楊能不能禦。各官俱擁衆兵不能勝寡敵。豈堪重寄。乞逮問。下兵部法司議。令各將協謀併力剿賊。若再踈虞。俱罪不宥。從之。

兵部言。通事達官馬雲馬清先奉使迤北。許也先細樂伎女。又許與中國結親。又言節減賞賜。皆出自指揮吳良致。開邊釁。請宣諸法。詔下錦衣衛鞠之。

癸丑。敕朝鮮國王李珣。今李滿住素與國王有仇。爲虜挾

寇宜戒飭邊將防備。

吏部尚書王直言亢旱爲災乞奮發乾剛思雪仇耻罷不急之務省無益之費日御便殿召諸謀臣宿將考論軍馬錢穀之實抗禦戰關之方守正以挫其鋒出奇以奪其魄敬恭武事必出萬全并自陳不職乞賜罷逐上慰留之戊午戶部奏大同缺糧草寇虜出入路梗不通宜令守臣遣官一員將解到折銀二萬兩撥馬隊官軍二百人每人馬上稍帶銀一百兩逐程取撥官軍運遞至山西副都御史朱鑑于官庫收貯依時糴買糧草暫於山西布政司及代州寄頓候邊境稍寧設法運赴大同缺糧草處供給從之。

處州賊陶得二寇武義縣。浙江按察司副使陶成禦之戰死。

得二先已招降。旣而復叛。率衆來攻武義。無城。惟設木柵。賊大至。或勸成稍却以避其鋒。成不可。麾兵與戰。自辰至甲。俄而縣中火起。蓋賊有潛入城爲內應者。兵遂大潰。成策馬突陣死之。事聞。贈左叅政。諭祭。配享越國公胡大海廟。廕其子魯爲廣東新會縣丞。成廣西鬱林人。初舉鄉試。告就遠方。授交趾典史。以有守有爲。累薦至今職。

立京圍營操法。

于謙以京師兵馬分隸五軍神機三千諸營者。雖各有

總兵然不相統一。每遇調遣。選摘湊撥。號令不同。兵將不相識。或至誤事。乃議揀選諸營馬步官軍一十五萬。分爲十營。每營各以都督總領。每五千用都指揮一員。每千又用指揮一員。把總每五百名用指揮十員。分管每隊用管隊二員。常領在營操練。統體相維。兵將相識。出征就令原管都督等官統領前去。號令歸一。行伍不亂。團營之設自此始。

命布政孫原貞爲兵部右侍郎。參贊浙江總兵都督李信軍務。

南京禮部尚書王英卒。

戮左都督楊俊。

俊先守備獨石馬營等處。土木之變。棄城逃歸馬營龍門等八城。皆不守。旣而命爲叅將。帥兵巡哨懷來等處。復輒調永寧守備官軍于懷來守備。將永寧城西門砌塞于謙劾其方命專權。擅作威福。詔宥不問。俊又以私怒都指揮陶忠杖撻凌辱死。其父洪懼禍。奏取俊還京。隨營操練旣至。謙併劾其獨石棄城喪師辱國。及懷來私仇捶死邊將之罪。謂非誅俊無以懲戒將來。兵科給事中葉盛等亦劾之。于是逮繫法司議罪。斬于市。

城固原

壬戌敕寧夏總兵都督張泰叅贊軍務僉都御史韓福等分哨。今犯寧夏。達賊尚在河套。卽行延綏鎮守官夾攻截

殺以除邊患。

大同知府霍瑄奏。渾源州被虜剽掠。無城可居。願于腹裏
磚城避住。就食庶全性命。事下戶部。行鎮守左都御史沈
固等區畫。固議。請缺食。饑民發廩賑貸。老幼疾弱者暫還
腹裏有糧之處。精壯丁力存留守城。仍蠲其糧差從之。

乙丑。總兵石亨等奏。召募勇敢。分俵馬匹。挑掘濠塹。分給
屯牛。并火器軍器俱全。給與大同等衛。并鴈門應用。俱從
之。

丙寅。陞總督軍務兵部侍郎侯璉爲尚書。總兵都督僉事
田禮都督叅將同知方英俱爲右都督。

先是貴州新添平越清平興隆等衛圍困已久。禮旣進

兵鮮新添平越之圍。然道路猶梗。進調署都指揮鄭儁
攻都盧等處。宣慰使隴富剽水西賊。俱敗之。斬首四十
餘級。溺死三百餘人。水西至貴路始通。又行雲南總兵
官調兵由烏撒會兵。通畢節等路。調安普州土官隆本
率土兵援安南。衛指揮蕭能出城夾攻擒首賊二人。斬
首七十餘級。賊復集據紫塘等寨。璉破之。遂克彌勒安
南等十餘寨。降阿蒙等五寨。賊復圍平越。璉等回兵擊
退之。遂分哨七盤坡。半腹河。楊老堡等處。以解清平之
圍。仍哨清平。迤東至重安江。與靖遠伯王驥兵會。自是
興隆抵鎮遠路皆通。

辛未北虜也。先陰使虜酋阿剌知院遣其叅政完者脫歡

等貢馬請和。邊將留于懷來以聞。命大常寺卿許彬、錦衣衛都指揮同知馬政往審虜使事情。

是時韃靼政事也先專之。其兵最多。脫脫不花雖爲可汗兵稍少。知院阿剌兵又少。君臣鼎立。外親內忌。其合兵南侵。利多歸也先。而弊則均受。及也先欲和。耻屈意而陰使阿剌等來言。於是禮部會議。奏命彬等往審之。虜使言欲朝廷差大頭目去阿剌及也先。脫脫不花處講和。退軍。如欲迎。上皇就奉還京。若不講和。我三家盡起人馬來圍大都。彼時無悔。且言此非特阿剌意。凡我下人皆欲講和。如朝廷不信。留我一人爲質。奏至召

其部尚書兼翰林學士陳循等于文華殿諭之曰。也先

背逆天道邀畱。上皇不共戴天之仇如何可和。循等請勅諭阿剌并賞來使令回。以緩其譎詐之請。仍敕在京各營各邊關整擐軍馬以備從之。

六月癸酉。六科都察院等衙門太子太保吏部尚書王直等言。黠虜遣使請。上皇還京。益上下神祇陰祐其衷。使之悔悟伏望。皇上許其自新。俯就虜情。亦遣使臣前去審察誠僞。如果至誠。特賜俯納奉迎。上皇以歸。不復事天臨民。陛下但當盡崇奉之禮。庶天倫厚而天眷益隆。上以勿遺後患。諭之。

上曰。卿所言理當然。此大位非我所欲。益天地祖宗及宗室文武羣臣之所爲也。自大兄蒙塵。朕累遣內外

官員五次賫金帛使虜城地方迎請。虜不肯聽從。若今又使人往恐虜假以送駕爲名。羈留我使。乃率衆來犯京畿。愈加蒼生之患。朕意如此。卿等更加詳之。勿遺後患。

丁丑。戶部奏真定保定涿州易州用糧。請再以河南并直隸民運京糧。摘撥三十萬石。運至保定易州均收。及將今年原坐京倉小麥。河南布政司四萬石。改運真定府。山東布政司五萬石。改運至定州收積待用。從之。

兵科給事中葉盛因天象示變。條陳弭災防患一十二事。命所司議行之。

乙卯。諭戶部榜示天下。定與則例。令于山西代州納米中

鹽有能自備脚力於臨清領糧運赴代州至三百石者卽與冠帶。二百石給敕旌異。復役三年。

兩淮鹽每引米八斗。浙鹽六斗。長蘆鹽三斗。河東鹽二斗。俱不次支給。

壬午。敕戶部郎中謝佑往山西督同三司并各府州縣官設法起倩民夫三萬并催督該納糧儲送大同各城交納。癸未。薊州守臣奏賊寇出沒糧運不繼。請如大同宣府納米中鹽戶部請不分四品以上官員軍民之家俱許中納。兩淮鹽引每米六斗。兩浙鹽引每四斗。俱于福建鹽內不次支納從之。

乙酉。五軍坐營都指揮僉事王淳進練兵圖八本。詔兵

部同各營總兵官采用之。

陝西蘭州舉人段堅言二事。禮部議窒碍難行。寢之。

一曰遠闕寺。言王振竊柄之禍。并西寧陝西等處悉令宦官監軍。乞各徵回。二曰闕異端。請銷天下道佛銅鐵像。補造軍器。并天下僧道之少壯者實軍伍。

上皇駕至大同。

先是虜北入既深。又議選戰馬奉。上皇南歸。是日至

大同。虜聲言送駕。守將郭登等設計。于城月門裏具朝服以候。潛令人伏城上俟。上皇入。卽下城闌板。既及門。虜覺之。遂擁上皇退去。

丁亥。少保于謙言。南京災異迭見。乞敬天仁民法祖。公賞

罰戒遊畋却玩好。上嘉納之。

上曰。災異迭見。皆朕之過。覽卿所言。足見愛君愛國之心。朕當益加警省。庶回天意。但有見聞。尤須進言。以匡朕德。以盡卿職。

命副都御史王暹巡撫河南。

命大理寺丞薛瑄轉餉貴州。

戊子。總兵石亨言。鴈門關一帶山口。雖已築塞。賊猶漫山徑過。須斷其半山可行之處。京城四面宜築墩臺。以便瞭望。

署都督僉事劉鑑言。京師與懷來止隔一山。請自懷來築烟墩。直至京師土城。遇事令舉火以報從之。

宣府總兵朱謙等遇虜賊于南門教場擊却之獲馬四疋
北虜遣使請和禮部尚書胡濙等會奏迎復當從陞都給
事李實爲禮部侍郎羅綺爲大理寺右少卿克正副使以
行

帝御文華殿召文武羣臣諭曰朝廷因通和壞事欲與
虜絕而卿等屢以爲言何也吏部尚書王直對曰上
皇在虜理宜迎復必乞遣使勿使有他日之悔帝不
懌曰當時大位是卿等要朕爲之非出朕心于謙對曰
大位已定孰敢有議但答使盡禮紓邊患耳帝意始
釋曰從汝從汝言已卽退羣臣出大監興安呼羣臣爾
等固欲答使孰爲文天祥富弼其人耶王直面發赤大

言曰。今日羣臣皆在此。皆朝廷人。孰敢有不行者。興安語塞。及禮部以三品以上官具名封進。上命興安召實問其鄉貫。傳旨曰。恁累進章。朝廷素知忠節。上欲遣使虜中。如何。實曰。某雖才識不同。適朝廷多事之秋。安敢辭諒。亦不辱君命。興安忻然入內。故命之敕書。既下。則惟言報禮不及迎復。實訝。詣內閣白之。遇興安被詔曰。爾奉黃紙幹事。他何與焉。實等遂偕虜使北行。七月。上皇在迤北。

丙申朔侍郎李實等啟行。

丙午侍郎李實等至也。先所營失八兒禿之地。

也。先曰。兵端皆因通事陳友等小人締構。以致小事成。

大及我送 太上還京遣大臣來議又殺所遣使臣張
關保等我回北後遣使者盈不花等亦不生還其故何
也實答太師雖名送駕兵行不戢攻關掠野朝廷豈信
張關保死于陣者盈不花未至京皆以將士不以爲來
和而以爲戰故也也先曰喜寧是朝廷內臣我遣來何
爲亦見殺實等答曰喜寧蒙 上皇厚恩却乃導引太
師兵馬殺之宜矣也先曰 太上在此我令伯顏帖木
兒早晚恭敬未嘗失禮因以酪酒飲食實等

丁未北虜也先遣人引侍郎李實等伯顏帖木兒營見
太上皇進紵絲四疋粳米魚肉麪麪燒酒等物實等拜泣
問起居。

十二日實見 上皇所居者皮帳布帟。蓆地而寢。牛車

一輛。馬一匹。以爲移營之具而已。上皇謂實等曰。當

初。朕非以遊畋而出。乃爲生靈計。不意被留。皆王振輩
所致及也。先實意送朕回。又被喜寧屢次阻住。因問

聖母及 今上安好。上皇泫然淚下。旣又問舊臣數

人。又曰。在此踰年。始見卿等。實因奏曰。陛下錦衣玉

食。今服食粗陋。不堪。因極言王振寵之太過。以致傾危

國家。陛下蒙塵之禍。上曰。振未敗時。無人肯言。此

亦朕不能燭奸。今悔何及也。先宰馬置酒。以宴實等。實

因言來迎之意也。先曰。大明皇帝敕書內只講說和

不曾說接駕。大明皇帝畱在這里。又做不得我母的

皇帝是一箇閒人。我還你們千載之後。只圖個好名兒。你們回去奏知。務要差太監及大臣來迎。我便差人送去。如今送去呵。輕易了。復再三言之。

鎮撫湖廣右都御史王來會。保定伯梁瑤。率叅將李震等。攻破浪江。青龍渡。馬楊山等處賊。及甫田。靖山。并東山等。賊俱剿平之。

戊申。虜主脫脫不花。普化可汗。遣其平章皮兒馬黑麻來議和。復遣右都御史楊善侍郎趙榮使虜。

上皇在虜。音問不通者一載餘。有自虜脫回者。方知無急。虜亦遣使來通。但謫詐不可信。未可以使往報。善聞議和。慨然欲往。上從之。入皆危懼。善曰。上皇在虜。

食君祿者。于心何安。此爲臣者効命之秋。遂請行。

巳酉侍郎李實等辭。上皇歸也。先遣其右丞把禿同赴京。復遣人同羅綺往大同。調回山西大同一帶擾邊人馬。壬子。都御史楊善等啟行。

甲寅至懷來。遇李實等回。實將虜中與也先應答之詞。及一應事情并奉迎。上皇之意備細說知。使彼無訛。以全終始。

丙辰侍郎李實等至京。請使臣奉迎。上皇不許。

上問李實也。先講和之意虛實如何。實對曰。臣入番境。彼處虜人皆忻悅。夾道謳歌。沿途乳酪。勸臣飲之。咸願和好。皆因彼處人馬相繼病死。又因離家駐邊上日久。

論其和意似有實情。帝曰待楊善回來再定奪。

文武羣臣上章懇請遣使奉迎。上皇不許。

兀良哈寇山西鎮守山西副都御史羅通都督王良遊擊將軍石彪鎮守鴈門副都御史朱鑑大同總兵定襄伯郭登叅謀軍事左都御史沈固叅將許貴會兵禦却之。

丁巳大理寺少卿羅綺同右丞把禿等到京進貢朝見。

戊午把禿等奏討使臣。上不許。

庚申侍郎李實上請遣大臣奉迎。上皇。上命也先使臣明日回趕上楊善來再定奪。

實言先差臣等未嘗爲迎。上皇專爲講和。今已事完。其欲差人迎復定約日期出也先之口。臣特傳說虜情。

伏望 陛下如羣臣之請。另差有能大臣奉迎。上皇。雖虜變詐不測。亦可塞彼無詞。倘不差人去。則直在彼而曲在我。臣若不言。恐日後復差人。僉必曰臣實可差。臣自揣違期失約。自不敢去。若另行差人。亦不敢去。臣固不敢去。人亦不敢去。則彼此猜疑。猜疑則和議不成。則 上皇終不可復。干戈終不可息。邊鄙終不寧。臣頗悉虜情。故不懼斧鉞。昧死爲 陛下備陳。乞早賜乾斷。天下幸甚。

巡撫河南兼修築沙灣都御史王暹奏修河用工次第。自黑牟山抵蕭縣。每十里置舖專人提督修治。仍乞減免濟南兗州科差。以甦民困。從之。

八月乙丑朔

丁卯右都御史楊善至虜營也先見善等甚喜許送
上
皇還京。

也先問曰汝是何官答曰都御史曰兩家和好許多年
今番如何拘留我使臣減了我馬價與的段疋一疋剪
爲兩疋將我使臣閉在館中不放出這等計較關防如
何答曰比先汝父差使臣到我太宗宣宗皇帝前
進馬不過三十餘人所討物件十與二三也無計較一
向和好汝今差來使臣多至三千餘人一見皇帝每
人便賞織金衣一套雖十歲孩兒也是一般賞賜殿上
筵宴爲何只是要官人面上好看臨回時又加宴賞差

人送去。何曾拘留。或是帶來的小廝。到中國爲奸爲盜。懼怕使臣知道。從小路逃去。或遇虎狼。或寓別處。中國留他何用。若減了馬價一節。亦有緣故。先次官人寄書一封。差使臣玉喜送與中國某人。會喜不在。着吳良收了。進與朝廷。後某人怕朝廷疑恠。乃給權臣。因說曰。這着進馬。不係正經頭目。如何一般賞他。以此減了馬價。段疋及某人送使臣去。反說是良詭計減了。意欲官人殺害吳良。不想果中其計也。先答曰。者胡語云者。然辭也。又說買鍋一節。此鐵鍋出在廣東。到京師萬餘。呈一銅賣絹貳疋。使臣去買。止與一疋。以此爭鬪。而賣鍋者閉門不賣。皇上如何知得。譬如南朝人問使臣買馬。

價少。便不肯賣。豈是官人分付他來也。先答曰者。又說剪開段。正是回回人所爲。也將一疋剪斷兩疋。送與官人。克做課程。若不信。去搜他行李。好的都在也。先曰者。都御史說的皆實。如今事已往。都是小人說壞。善見說的意思和了。又曰。官人爲北方將帥。掌領軍馬。却聽小人言語。忘了大明皇帝厚恩。便來殺擄人民。上天好生官人。好殺將無罪人民擄去。有想父母妻子脫逃者。拿住便剜心摘膽。高聲叫苦。上天豈不聞之。答曰。我不曾着他殺。是下頭人自殺。又曰。今日兩家和好如初。早出號令。收回人馬。免得上天發怒降災也。先答曰者。者。問。皇帝回去還做否。答曰。天位已定。難再更換也。

先曰堯舜當初如何來。答曰堯讓位于舜。今日兄讓位于弟。正與堯舜一般。有知院伯顏帖木兒說將這使臣留下。再差人去問來。還着這皇帝做。然後放去。不然不要放去也。先曰當初問他要大臣來迎。既差來。又去。問是我失信了。着他迎。皇帝去罷。有平章昂克說汝來取。皇帝將何財物來。答曰若將財物來。後人說官人要錢了。若空手迎去。見官人有仁義。能順天道。自古無這等好男子。我監史書備細寫上。着萬代人稱贊也。先曰者者。都御史寫的好者。

戊辰都御史楊善等見上皇于伯顏帖木兒營。

已巳也。先設宴。請上皇至其營。餞行。楊善等侍飲。

也。先曰都御史坐。上皇曰太師着坐便坐對曰雖居草野不敢失君臣禮也。先顧善曰好禮數。

庚午伯顏設宴與上皇餞行并宴使臣。

癸酉上皇駕啟行也。先率衆頭目羅拜而別。伯顏率兵護送。

乙亥上皇過野狐嶺。

丙子。上皇至萬全右衛演武亭駐蹕。

丁丑。上皇至宣府南城東駐。

下千戶龔遂榮詔獄。

上皇已入塞。朝廷猶以虜情多詐爲疑。禮部連日會奏議奉迎禮未定。遂榮寓書于學士高穀言奉迎當從厚。

大略謂上皇之出非遊畋無益爲宗社計耳。今都人一聞駕旋無不喜躍則人心尚未厭上皇也。今奉迎禮當從厚。主上當避位懇辭而後受命乃可。不然恐千載史書難洗。穀袖其書入朝以示廷臣曰武夫尚知此禮况儒臣乎。王直曰此禮失而求之野耳。胡濙欲封進庶見朝野同情以感動上心。都御史王文曰匿名文書不得言之于謙言進封亦無妨。及禮科奏上得旨繳進。王文曰諸公勿累小子。契牢飲也。陳循見之恚甚。言遂榮非分請治其罪。遂下錦衣衛獄。尋會赦得釋。已卯上皇至懷來將抵居庸。禮部始得旨羣臣同禮部議迎復儀注。兵部總戎議防變方略。

朝退多官集會議所都御史王文忽厲聲曰來孰以爲來耶黠虜豈誠真彼不索金帛必索土地有許多事在就以爲來耶衆素畏文聞此皆相顧莫敢言武弁有趨出門去者矣旣而少保于謙言防變方略則在我與總戎如是而退給事中葉盛等造禮部問尚書胡濙從容言儀注已送內閣看矣王一人言豈可憑但彼欲如是言且姑任其言何能與辯當時會奏多吏部王直筆皆六部都察院通政司大理寺六科掌科官連署然主意皆出王胡會奏外惟翰林檢討邢讓一奏首有前次敕書不具迎復上皇之意一言直爲實錄戶科給事中李侃等奏內亦有堯舜孝弟之說報旨以爲譏朕者也

庚辰。上皇至唐家嶺。遣使回京。詔諭避位。免羣臣迎。

丙戌。百官迎。上皇于安定門。

上皇自東安門入。上迎拜。上皇答拜。各述授受之意。推遜良久。乃送。上皇至南宮。陞座。羣臣就見而退。大赦天下。

按侍郎劉定之曰。聖明承平日久。豐孽潛滋。內而姦臣播弄。外而驕虜憑陵。故已巳中秋之變。亘古所無。然尚賴天心默佑。皇圖鞏固。振威以遏其侮。厚德以順其化。故庚午中秋之慶。亦亘古所無。幹旋乾坤。撥亂反正。何其神速也哉。雖然。聖神相繼。千億萬年。撫念前事。豈不畱心于制治保邦之良圖也。

直內閣兵部尚書苗衷致仕。
鎮守雲南兵部尚書侯璉卒。

時普定圍急璉自雲南選善射者爲前鋒自將至普定疾戰矢下如雨賊大敗圍解遂趨貴州副總兵田禮等以兵來會克龍里甕城牟腸諸寨新添平越清平都勻諸圍俱解上嘉其功遂遷尚書又進克安莊西堡長官司時暑雨方盛疫癘大作璉得疾昇歸普定卒。

命保定伯梁瑤右都御史王來督同叅將都督方英陳友等征剿湖廣貴州等處苗寇仍遣河間等韃軍從征。

先是靖遠伯王驥與都督官聚張軌等還自麓川卽命征苗聚軌皆失利惟驥擒其酋叟富檻送京師然苗勢

愈熾驥亦不能定。奏言久在南裔身染瘴毒乞還。朝廷乃以瑄等代之。先是永樂間韃虜來降者多安置河間東昌等處。生養蕃息強悍不馴。方也先入寇之際。皆將乘機騷動。幾至變亂。至是發兵征湖廣貴州及廣東廣西諸處寇盜。于謙奏遣其有名號者厚與賞犒。隨軍征進。事平遂奏留于彼。于是數十年積患一旦潛消。

命總兵石亨楊洪率兵分道出紫荆居庸巡哨大同宣府順天府。奏鄉試取中式舉人劉宣等二百二十五名。

時主考侍讀學士劉鉉與侍講陳文及揭曉第一人劉宣乃盧龍軍士也。文欲更之。鉉曰。朝廷立賢無方。不可。乃止。後宣由翰林官至南京工部尚書。第三名則王越。

封威寧伯侯瓚歷南京兵部尚書賈俊歷工部尚書劉敷歷掌院右都御史阮勤陳儼俱歷侍郎張岐歷僉都御史。

應天府奏鄉試取中式舉人章袁等二百名。

陞右都御史楊善爲左都御史仍掌鴻臚寺事。

九月。上皇在南宮。

吏科左給事中程信上中興固本十事不報。

曰敬天求賢納諫謹災節用詳刑選將練兵尚儉隆師而敬天一事則言天象屢變請上隆孝友之實以答天心之仁愛聞者壯之。

命僉都御史祝暹鎮守保定。

命大理寺丞王禰出巡貴州。

命大理寺卿孔文英提督紫荆等關。

進直內閣侍讀商輅爲翰林學士。

十月。上皇在南宮。

命靖遠伯王驥守備南宮。

少保于謙奏起都督孫安修復獨石馬營八城。

八城爲虜所破。謙謂此不可棄。起安授以方略。且戰且守。八城復完。

南京守備奏沿江盜起。乞行御史錦衣衛巡捕。命止行御史。

刑部尚書俞士悅以爲當准。因給事葉盛言。不差錦衣

三
日
正
系
一
二
卷
三
一
衛。

命副都御史劉廣衡巡撫陝西。

廣衡至彼陳安邊禦寇利國安民急務十事多見施行。
督修城堡七十餘處。

十一月。上皇在南宮。萬壽聖節。禮部尚書胡濙等請羣
臣朝。詔免朝。

國子祭酒蕭鎡乞致仕。監丞鮑相合國子生三千人請留。
上可之。尋命經筵講官。

召鎮守副都御史羅通協贊京營軍務。

命僉都御史任寧巡撫宣大。

命副都御史宋傑鎮撫甘肅。

命僉都御史陸矩叅贊延綏軍務。

封宣府都督朱謙爲撫寧伯。

南京吏部尚書魏驥進表至京乞致仕許之。

內閣陳循驥考試時所取士請曰先生雖位冢宰然未嘗立朝願少待事在吾輩而已驥不從退謂人曰渠將朝廷事爲一己私事安得善終。

南京國子監祭酒陳敬宗引年致仕。

敬宗以不見內侍之故在南京十八年未嘗兼階士大夫高其風節。

命都督同知沐璘爲征南將軍鎮守雲南。

十二月上皇在南宮禮部尚書胡濙請明年正旦百官

朝 上皇于延安門不許。

命大理寺少卿羅綺出鎮寧夏。

命右都御史李實出撫湖廣。

荆王瞻墻請朝 上皇不許。

辛未景泰二年正月 朔 上皇在南宮。

禮部儀制司郎中章綸請增會試取士額從之。

命僉都御史王竑總督漕運。

竑所至政先除奸墨貪吏聞風多遁去其逮問者無所寬假悉置諸法閭閻豪右夙肆橫侵者必捕罪之由是相戒毋輒犯一時吏民咸畏其威如神明。

翰林學士周叙上言請令羣臣依舊制輪流向前說事庶

得吐露肝膽不宜泄于外不從

叙言臣叨班行伏見永樂洪熙宣德三朝臨御大班旣退各衙門卽于門上次第說事君臣相與商確政務罄盡所言人懷畏憚而事機不泄誠密勿廟堂之笑自正統以來王振擅權獨立在傍于是輔弼大臣及近侍官員不得召對對亦不敢盡言以釀成今日之禍

敕御史練綱巡視兩淮鹽課

自是權貴中鹽者斂戢

調兵部侍郎項文曜爲吏部侍郎

文曜附于謙謙愛之時吏部缺右侍郎欲用文選郎中李實因嫌陞本部與王直並又因謙薦文曜遂調吏部

及至吏部。何文淵同王直爲尚書。見寵于景帝。復阿附之。

二月。會試天下舉人。命戶部侍郎兼學士江淵修撰林文主考。賜宴于禮部。

撤棘取中式舉人吳滙等二百名。

巡撫湖廣右都御史李實率叅將李震右布政馬謹等攻破武岡城。溪平水小言臘鳥等處苗賊擒獲賊首楊光峯等五百六十餘人。斬首倍之。并扶城等寨悉降。

大理寺丞薛瑄乞致仕。不允。

三月。廷策會試中式舉人。賜柯潛劉昇王與進士及第。吳滙等七十五名進士出身。曹衡等一百二十二名同進士。

出身。

正午忽大風驟起黃塵漲天侍講徐理等曰今日譬之
人家納婦贅壻而變異若此進士中他日其有小人債
事者乎良久一貢士紙卷爲風雨颺半空呼之至乃濬
縣王越也云文已成尚有藁底在都給事葉盛謂御史
陳叔紹當入奏庶不誤此生三年叔紹遂執筆至奏尾
思而未得盛曰以全盛典旣而得旨禮部再給紙卷後
越附太監汪直襲破威寧封威寧伯是科得馬文升余
子俊秦紘楊守陳林鶚高明鍾同皆爲名臣

總督貴州軍務右都御史王來率兵平香爐山擒酋王甫
同烈并將官五十八人械送京師。命禮部主事孫茂齋

敕獎諭仍賜金帛。

來受命至湖廣沅州。考圖定策。運謀設法。勉諸將以忠義。以官軍九萬八千分爲五哨。三令五申。前進辰靖州等處。至貴州重安江。苗王韋同烈聚衆八萬。據江拒敵。於是分兵連戰大破之。斬首三千餘級。官民與苗人旗幟雜出。賊勢窮蹙。奔遁相蹈籍溺死者甚衆。乘勝長驅。擣其巢穴。韋同烈與僞帥紀歌兒走香爐山。其山壁立千仞。根盤三十餘里。乃審鄉道築排柵。搭架楊橋。飛樓以火鎗火箭晝夜攻擊。又置襄陽砲六座。四圍擊之。裂其崖石。絕其糧道。賊衆大窘。生擒王韋同烈等械送京師。明正其罪。餘黨數萬并東西苗酋悉撫寧之。

命漕運僉都御史王竑兼巡撫廬鳳淮揚四府徐和滁三州督常盈倉

從吏科給事中李瓚建議遂爲定制

四月都御史王竑因廬鳳徐淮諸郡大饑河南山東流民猝至不待奏報大發廣運倉米賑濟然後奏聞上嘉獎之

時民饑死亡不可勝計至有相煽爲盜將貽朝廷之憂者竑乃蚤夜備精劬力經畫救荒之策至亡寢食大發官廩及歛富人所輸之粟厚賑恤之諸廩已空獨廣運倉所儲尚富然是倉之所儲乃備京師用者故朝廷歲遣一內臣一戶部官同主之竑欲先發是倉以賑然後

以聞而主者有難詞。竝謂之曰：民惟邦本，本固邦寧。民窮至此，吾恐貽憂于朝廷。故欲亟發此耳。爾不吾從，有變。吾先殺爾，以治爾召變之罪。以謝衆怒，以免朝廷憂。而吾則請罪于朝廷也。主者不復有難詞，乃大發以賑濟。近者日飼以粥，遠者量散以米。流徙者給以口糧，疾病者委醫以治，死亡者與棺以葬。鬻賣者贖還其人。前後全活者二百二十九萬餘人。醫治得生者三百四十餘人。贖還家者一千三百四十八人。及瘞埋者三千三百餘人。於是居流之民舉安。謠曰：生我者父母，活我者巡撫。凶年不荒，軍民安堵。遂立生祠祀。或又集爲錄曰：救災傳。先是淮上大饑，帝于樓轎上閱疏，驚曰：柰何！

百姓其饑死矣。後得竝奏。輒開倉賑濟。大言曰。好御史。不然。餓死我百姓矣。

詔顏子後裔希惠。孟子後裔希文。並授翰林五經博士。世襲。

授誠意伯劉基七世孫祿。翰林院五經博士。

陝西民饑。命左都御史陳鑑賑之。

五月。命直內閣侍郎江淵巡視淮徐諸郡。

淵條陳三事。一淮之常盈。徐之廣運。諸倉俱在城外。宜築月城以守之。一天津爲河北之會。鳳陽爲中都之會。宜放操軍以守之。一河南爲中原之要地。北平爲京師之巨甸。宜選民兵以守之。疏上。命所司議行之。

禮部尚書楊寧病足疾不便朝調南京刑部尚書
命副都御史軒輅總督南京糧儲

六月朔日食

四川巡撫僉都御史李匡率兵攻草塘賊敗之

錦衣衛指揮盧忠有罪伏誅

上皇在南宮忠上變妄言帝怒殺中官阮浪等猶欲

窮治不已忠嘗屏人請卜者全寅筮之寅以大義叱之
曰是大凶兆死不足贖忠懼乃佯狂爲風狀學士商輅
與司禮監太監王誠等言盧忠是個風子豈可聽信他
壞了大體傷骨肉之情後追問忠果謂供養真武得其
通報以妄言伏誅寅山西安邑人少瞽而性聰警學京

房易占斷多奇中。名聞四方。正統間客游大同。上皇
旣北狩。陰遣使命鎮守太監裴富問寅寅筮得乾之初
九。附奏曰大吉。可以賀矣。龍君象也。四初之應也。龍潛
躍必以秋。應以壬午。浹歲而更龍變化之物也。庚者更
也。庚午中秋車駕其還乎。還則必幽。勿用故也。或躍應
焉。或之者疑之也。彼七八年必復辟。午火德之王也。丁
者壬之合也。其歲丁丑。月壬寅。日壬午乎。自今歲數更
九躍則必飛。九者乾之用也。南面子衝午也。其君位乎。
故曰大吉。旣而曰也。先無能爲也。且彼氣已驕。戰之必
克。虜果敗去。踰年也。先欲奉。上皇南還。時率以爲詐。
獨撫寧伯朱謙上書懇朝廷持不敢發。寅力言于亨曰。

虜人順天舉義我中國反失奉迎之禮獨不爲夷狄笑乎亨遂與于謙協議遣使虜果奉乘輿來歸

命兵部侍郎揭稽巡撫廣東

畿內蝗命大理寺右少卿陳詢巡視

七月北虜也先寇獨石命工部尚書石璞兼大理寺卿轉餉勒兵修垣守險

處州盜平析麗水青田二縣置雲和宣平景陵三縣

係兵部侍郎孫原貞奏立

以薛瑄爲南京大理寺卿

命僉都御史韓福叅贊寧夏軍務

命戶部侍郎劉璉總督遼儲兼撫宣府叅贊軍務

八月巡撫南直隸工部尚書周忱乞致仕。命戶部侍郎李敏代之。

忱在南畿二十二年。兩遭喪。皆起復視事。忱爲人謙恭。不立崖岸。謀慮深長。嘗採衆論。征輸皆有常度。遇屬郡有荒歉。卽以便宜行事。撥餘米以補成數。凡官府織造。供應軍需及馬草夏稅鹽鈔驛馬鋪陳歲辦該征者。盡出于所積餘米。民賦歲輸外。再無他役科征之擾。諸郡縣學校先聖賢祠宇。橋梁河道多所修葺。濬治一切取諸餘米。人爭爲立生祠。沒因以祀之。後戶部言濟農餘米失于稽考。奏遣曹屬盡括餘米歸之官。于是徵需雜出而逋負日久。人益思忱之功。

上幸國子監釋奠孔子

祭酒蕭鎡講臯陶篇天聰明一章稱旨。

九月北虜遣使求通好固邀我使往報。上從言官之議
詔絕之。

執政謂苟不往報恐開邊釁。侍講劉定之言宜遣使羈
縻之使我得以益修內治言官以虜懷窺伺之心宜絕
之。

詔廷臣共議備邊長策。吏部文選郎中李賢請備戰車及
火鎗。命將臣採行之。

賢言虜所以敢輕中國者恃其弓馬之強而已。臣觀今
日之拒馬木止能拒馬不能避箭挨牌止能避箭不能

拒馬今中國長策。惟有所謂戰車。若衛青之武剛車。可以禦之。而又有取勝之道。則火鎗是也。論中國之長技。無出于此。若用得其法。虜弗能當也。臣觀車制。四圍箱板。內藏其人。下留鏡眼。上開小窓。長一丈五尺。高六尺五寸。前後左右。擺列鎗頭。每車前後占地五步。若用車一千輛。一面二百五十輛。約長四里。欲行則行。欲止則止。謂之有腳之城。內藏軍馬糧草。輜重。以此禦敵。使馬不得衝車。箭不得傷人。彼若近前。火炮轟發。奇兵繼出。彼若遠遁。我勢益張。我威益振。備邊長策。莫善于此。

陞翰林侍講陳文爲雲南右布政使。

文與商輅二人係學士曹鼎選侍。

英宗經筵展書。尋

侍講至是大學士高穀薦文爲吏部侍郎王直格不行出陞外省。

十月浙閩盜平進兵部侍郎孫原貞爲兵部尚書仍鎮守浙江福建。

詔福建置永安壽寧二縣。

係侍郎孫原貞奏立。

以文選郎中李賢爲兵部右侍郎。

命祭酒蕭鎡爲戶部右侍郎與禮部右侍郎王一寧俱兼翰林院學士直文淵閣參預機務。

鎡因上幸學受知一寧嘗教太監王誠因併薦入杖中書舍人何觀調外任。

觀辦事文淵閣奏言大臣如尚書王直胡濙等正統中
皆阿附權姦今此輩老猾不宜在左右及言北虜來朝
宜驅置于南方下科道看議以聞吏科給事中毛玉爲
奏稿謂觀誣陷大臣擅開邊釁宜正觀罪語同列林聰
葉盛皆勸玉易稿不從盛曰朝廷大開言路未嘗罪一
言者雖罪觀猶令我曹看議益甚盛德也君獨不念劉
球之事乎球之死入至今以王振馬順爲恨此諸君所
親見也雷霆之下萬一不測是我曹爲之而成朝廷不
容直言之名且諸君亦言官獨不爲他日計乎玉意解
乃稍易數語奏上詔令錦衣衛杖觀調外任明日葉
盛道遇錦衣二鎮撫語及杖觀事皆曰彼何可深罪杖

惟其數耳。是武臣猶知事體。毛玉言官獨覘望云。

少保王文諷十三道劾戶部尚書金濂隱惡濂以袁旭事劾文降旨落太子太保。

兵科都給事中葉盛請舉行祖宗午朝故事。不報。

時禁中頗事遊畋故請行之。

十一月巡撫宣大僉都御史任寧被兵科劾不職去任。

叅贊宣府僉都御史李秉奏請銀三萬兩買牛給貧乏軍民耕田秋成償其價從之。

十二月加直內閣陳循少保兼文淵閣大學士高穀少保兼東閣大學士。

禮部尚書胡濙請令百官朝賀上皇萬壽聖節于延安

門不許。

壬申景泰三年正月。

朔。上皇在南宮。

詔各處見任官員有才行行政事優長屈在下僚及有文學才行堪授職任之士隱于民間及官罷職委無贓犯重情而才學可用者並聽在京四品以上在外巡撫巡按方面并府州縣正官舉薦赴京考用所舉之人後犯贓罪連坐舉主。

命中允倪謙呂原爲侍講學士兼中允。

上選內侍秀異四五人進學于文華殿之側室倪謙呂原實教之。上時自親臨。命二人講倪講大學呂講堯典講罷問二人何官倪時以左中允兼侍讀呂以右

中允兼侍講。又問幾品。皆曰正六品。上曰。二官品安得相兼。命取官制視。乃命二人以侍講學士兼中允。命刑部侍郎耿九疇鎮守陝西。

初六部卿佐使外。文移不得徑下按察司。以故偃蹇不受約束。九疇首奏下之。

命僉都御史鄭顥巡撫雲南。

禮部儀制司郎中章綸言太平十六事。下所司議行之。

二月。北虜也先攻敗普化可汗。來獻捷。

河決沙灣堤。命左都御史王文行視河道。

召鎮守遼東左都御史王翱掌院事。

三月。有星孛于畢。

前直文淵閣侍讀彭時起復止補翰林院。

北虜寇廣寧。

命右僉都御史李秉叅贊宣府。

秉抵任請銀三萬兩買牛給賞乏牛軍民耕種秋成償其價軍民樂業邊餉克足時北虜以剽掠男婦易米朝議每大口米一石小口米五斗虜不從秉曰是重物而輕人也每口與米一石總兵官以爲礙例秉曰何忍使我赤子爲夷人也專擅之咎吾任之悉如數與之後聞帝以秉爲是。

四月命都督同知孫安鎮守獨石馬營以兵科都給事中葉盛爲山西右叅政協贊軍務總督邊儲。

先是獨石馬營等處八城遇虜失守殘毀未復議者欲棄之于謙曰棄之則不但宣府懷來難守京師不免動搖乃薦安授以方略仍命盛贊其軍務盛至列其利害八條以進次第行之與安率兵度龍門關且戰且守八城完復如舊盛又請官銀五千兩買牛千餘頭簡戍卒不任戰者俾事耕稼歲課餘糧于官凡軍中買馬修器勞功恤貧諸費皆于是乎取給盛在獨石五年邊人賴以賑給歲亦屢登。

命僉都御史王暹賑濟徐州饑民。

學士商輅請振舉屯田事下該司議行。

輅言口外田地極廣因先兩京功臣等官將口外附近

各城堡膏腴田地占作莊田其諸空閒田地又被鎮守
總兵叅將都督指揮等官占爲己業軍士無近便田地
可耕夫且耕且守如漢趙克國諸葛亮晉羊祜皆有已
行之明效今日守邊之要莫善于此若舍屯種之外而
欲邊城克實雖傾府庫之財竭生民之力奈軍士數多
歲月久遠亦難繼矣

按大學士王鏊云國家邊費最大欲省轉運之費莫若
興屯田兵法取敵一鍾當吾二十鍾屯田一石當轉輸
二十石趙克國留田湟中內有亡費之利外有守禦之
備卒坐困西窺唐韓重華營田之利東起振武西逾雲
州極于中受降城歲省錢千三百萬緡此前事之明效

也。今三邊之地固在也。而人以爲不可行者何哉。

叅贊宣府軍務僉都御史李秉陳備邊十三事。下所司議行之。

其目曰。設武學以蓄將才。恤孤老以廣仁政。增衣糧以恤貧寒。城縣治以衛居民。汰冗員以節邊儲。專防禦以固城池。委將帥以肅邊備。行營田以防邊患。責典守以革奸弊。防虜使以杜奸謀。修墩堡以防剽掠。均田土以息爭端。貸官鹽以益邊餉。

廣西都指揮使黃珣上疏請易太子。下禮部會多官議。

珣廣西思明府人。上世皆土官。第瑯以世嫡爲思明知府。珣亦以捍禦功累遷廣西都指揮使。守潯州者八年。

軍民畏服。賊不敢犯境。景泰二年八月。一夕。玠陰謀使所部民兵四五千包圍府。黎明。執瑄并二子家人頭目。數其貪虐之罪。幽囚府監二日。并其父子俱殺之。實玠且奪嫡陰主其謀。乃使其子灝陽以其事聞于官。若欲爲伸理者已。而巡撫刑部侍郎李棠。總兵都督僉事武毅等。發其情罪。付獄究治。坐當死。玠遣人赴京。先賂用事者。乃具奏請立見。濟爲東官。

上欲易太子。恐文武大臣不從。與太監王誠舒良謀。先啗內閣諸學士。各賜金五十兩。銀一百兩。命廷臣俱兼官條。

王直胡濙兼太子太師。陳循高穀于謙兼太子太傅。儀

銘俞士悅楊善王文王翱何文淵並加太子太保江淵
蕭鉉王一寧並加太子少師商輅進兵部左侍郎兼左
春坊大學士。

禮部尚書胡濙等會大學士陳循高穀等及六部都察院
尚書王直等并六科十三道議太子爲可易如黃珌所請
上之。

時多官集議都御史王文首言當立大學士陳循等遂
承上意附之及署名王直有難色循持筆半跪奉直直
因署之唯給事中李侃對衆灑泣都給事中林聰御史
朱英亦知不可然皆不能出一語爭之後侃陞詹事府
丞聰陞春坊司直皆不能辭信乎臨大節不可奪者爲

難得云。

遼東提督軍務都御史寇深巡撫都御史李純總兵都督曹義上戰守方略從之。

五月 上皇在南宮

甲戌廢 上皇長子皇太子見某爲沂王出就沂邸立皇太子見濟爲皇太子生母杭氏爲皇后廢皇后汪氏居別宮大赦天下

先是 上欲易儲語太監金英曰七月初二日東宮生日也英叩頭云東宮生日是十一月初二日 帝爲之默然益 帝所言者謂見濟英所言者謂 上皇長子與魏徵獻陵之對相似英之賢若此陳循輩亦可以愧

聖明本義卷一
四十五
死矣。

赦黃珣復原職尋陞都督令巡撫刑部侍郎李榮致仕。
王直得所賜金寶扣案頓足歎曰此何等大事乃出一
蠻夷也吾輩皆愧矣累疏求退于諫無一言王文陳循
貪其利自以爲榮其士風亦可慨云。

命侍郎姚夔李賢鄒幹等都御史薛希璉洪英劉廣衡等
巡行天下考察庶官。

六月岷王徽煖乞徙封不許。

召征南總兵官保定伯梁瑤提督右都御史王來回京。

以苗寇稍寧故召之。

以王來爲南京工部尚書。

叅贊宣府軍務僉都御史李秉劾都督紀廣叅將楊能怠忽邊備能亦誣秉不法事。命御史練綱給事嚴誠往勘果誣敕下能等切責之。

國子監祭酒劉鑑請禁止監生給引詐病在京及托故在京守制等弊。命犯此到部者送法司懲之。

時監生多潛住在京奔競成風有家近在京者當依親之時雖給文引仍在京潛住。一聞行取不待勘合到原籍官司輒詣部告病不曾還攬先復監亟求出身。又有聞父母之喪托故在京守制及由未滿卽行起復速求利祿有傷風化。

七月命左都御史王翱總督兩廣軍務。

兩廣地勢接連休戚相關故景泰元年廣東黃蕭養之變廣西曾動調官軍一萬之上前來策應及景泰三年廣西有常萬秀之變總兵武毅節奏協濟而廣東副總兵董興不調兵應援彼此猜忌事多牽制及寇賊擾攘兩鎮將官互相觀望不卽剿捕朝廷更置其將簡左都御史王翱總兩廣軍務自總兵以下悉聽節制凡事得便宜而行於是事權歸一而提督之任遂爲東南重鎮矣。

廣東西守將董興武毅龍。命副總兵翁信鎮守廣東陳旺鎮守廣西。

太子少師王一寧卒。贈禮部尚書諡文通。

八月。熒惑晝見。

命副都御史年富巡撫大同。

九月。掌南京兵部事靖遠伯王驥乞解機務。從之。

召南京大理寺卿薛瑄爲大理寺卿。

時有中官金英奉使出。道南京。公卿俱餞于江上。瑄獨不往。英至京言于衆曰。南京好官惟薛瑄耳。遂召入。

閏九月。立團營。

十月。命太子太保左都御史王文爲吏部尚書。兼翰林學士。直文淵閣。

文初與中官王誠結爲兄弟。謀入閣。嘗私以語高穀。穀亦嫌陳循獨見寵任。思有以間之。乃疏請增內閣員數。

且云不拘繁劇衙門。詔下內閣推舉陳循曰。旣不拘繁劇衙門。則法司亦可。乃舉都御史蕭維禎。穀遂舉文。竟用文。

壯虜也。先請命使往來。不許。

十一月己未朔日食。

邊將請臨洮諸衛添取防兵。巡撫陝西都御史耿九疇議止之。

九疇上疏言。邊城士卒不爲少矣。在爲將者御之何如耳。果能嚴紀律。精練習。勤撫恤。絕侵漁。以養其銳氣。則一可當百。加以賞罰明信。則人人思奮。不然。徒冗食耳。從之。

副都御史劉廣衡考察湖廣官吏條陳軍民利病數事。詔所司議行之。

癸未。客星見輿鬼。

十二月。詔戶部差官清理鹽法。

諭吏部申敕薦舉。

癸酉。景泰四年正月。

朔。上皇在南宮。

北虜也先殺其主脫脫不花。併其部落。自稱大元田盛大可汗。遣使入貢。命議羣臣所以稱之者以聞。

禮部郎中章綸言。可汗乃夷狄極尊之號。今以稱也先。則非宜。若止稱太師。恐虜酋慚忿。犯我邊陲。宜因其部落舊號。稱爲瓦剌王。庶幾得體。從之。

皇明史稿卷一百一十五
早場火。朝廷欲置典守者罪。大理寺卿薛瑄力辯其無
辜宥之。

吏部尚書何文淵罷。

時科道交章劾文淵貪縱姦邪實跡。乞治其罪。詔下
文淵獄。文淵自言易儲有功。詔書所云天佑下民作之
君。父有天下傳之子。已所屬對也。乃令致仕。

戶部侍郎李賢奏虜欲無厭。不宜終徇。宜奮勇勵武臣以
挫虜長驅之勢。詔下兵部行之。

賢言北虜也。先近殺其主。併吞諸夷。包藏禍心。其志非
小。若只聽其講和。圖金帛之利。蔑敬順之誠。增數冒名。
曾無定約。竭生民之膏血。供無厭之貪求。醜類日見強。

盛中國益加罷弊。持此悠悠。實非長慮。惟陛下奮仁者之勇。勵總戎臣惕然寸心。必不自逸。觀釁而動。以挫長驅之勢。振中國之威。則夷狄之心自懾。方來之患自弭。詔下兵部。少保于謙謂李賢言誠爲正。請下其章以勵邊臣。

改巡撫陝西侍郎耿九疇爲都察院左副都御史。

陝西布政使許資言鎮守侍郎與巡按御史不相統攝。文移輒礙。廷議改都御史。

改各處鎮守侍郎爲巡撫都御史。

二月。以左都御史王翱爲吏部尚書。

時吏書缺。上命舉可稱任者。練綱率諸御史上言都

御史王翺嚴公峭直。右副都御史年富操履端方。大理寺卿薛瑄持正不回。此三人者。擇而用之。庶能品藻人才。追蹤王直。于是召翺爲吏部尚書。翺嚴加考察。公銓注。抑奔競。杜請託。一時任使。並稱得人。

巡撫侍郎羅綺率兵討松藩夷人。攻破黑虎諸寨。平之。

三月。改吏科都給事中林聰爲國子監學正。

聰欲論王文而言先泄。文中傷之。屬聰甥該補教官。聰爲囑善地。文選出其手書。文嗾御史王溥劾之。欲寘之死。會官廷議。擬大臣專擅選官律。廷臣附會。無敢違者。禮部尚書胡濙謂文曰。給事七品官也。而擬大臣。囑託公事也。而擬選法。二者于律合乎。且人臣以宿憾而欲

殺諫官。無乃不可乎。遂拂衣出。曰。此疏吾不預。公等自爲之。遂罷。湮歸卧病不朝數日。上問以病對。使太監興安問疾。湮曰。老臣無疾。前者議事驚悸不安爾。安問何爲。曰。諫官有小罪而欲殺之。此所以驚悸也。安以告于上。詔曰。比擬殺人可乎。聽得不死。

南京工部尚書王來條陳時政十二事。下所司議行之。其目曰。敦教化以厚民俗。勸農桑以立本業。揀冗官以省濫費。罷造作以甦民力。明賞罰以勸事功。崇師道以育人才。修武備以振兵威。抑奔競以勵士行。嚴選舉以進賢能。選將帥以寧邊鄙。增屯田以紓民運。救荒政以備旱潦。

大理縣志卷之十一
五月
四月獨石總兵都督孫安奏墩軍言永樂來每有預備餘糧二石柴水一月遇警食用之乞如例戶部尚書金濂查無例止之

永樂十二年七月十二日巳時總兵府武安侯欽奉敕書各處烟墩務要增築高厚於烟墩上收貯五個月糧食柴薪并置藥弩於上就於烟墩傍邊開井井外包圍烟墩相平使外面望之只是個烟墩不知其中有井務要堅厚勿致坍塌此事與鄧鎮交易銀兩事頗類但墩傍開井一事本難行至今無能行之者不知當時武安曾覆請否

大理寺卿薛瑄辯雪蘇松避罪饑民從之

蘇松民饑乞粟。富家不與。遂火其屋。蹈海以避罪。時遣太子太保王文往訊之。文以謀叛連坐五百餘家。衆皆畏勢莫敢發瑄抗章辯爭。文亦悟其非。獲免者甚衆。

右都御史洪英以考察浙江官吏被誣訐致仕。

英素不識中官。考察秉公直。被黜者妄訴之。且加謗毀。朝廷不及考而罷令致仕。人多惜之。

少保兵部尚書于謙薦左諭德徐有貞爲國子祭酒。上密諭止之。

時缺祭酒。有貞以門生楊宜爲謙內姻。懇求再四。謙因中官言于上。上召謙至文華殿。辟左右諭之曰。徐有貞雖有詞華。然存心奸邪。豈堪爲祭酒。若從汝用。將使

後生秀才皆被他教壞了。謙叩謝而退。不敢言。有貞不得知。反銜之。

五月。直內閣太子太保王文以憂去。

修歷代君鑒成。

歲星晝見。

六月。浙江福建民鄭懷胃王孝心等作亂。命副都御史劉廣衡督兵捕之。

至則賊已就擒。乃察其嘯聚之故。以山有銀場。連亘深僻。賊得以潛伏其中。卽命伐山通道。具奏設縣治。以便巡視。其患遂息。已而守臣以所獲賊屬。俱論謀逆。報功希賞。乃覈其實。得首者十人。餘悉縱之。事竣而還。賜白

金絲幣甚厚。

災異求直言。巡撫陝西都御史耿九疇條陳弭災急務六事。且乞罷黜以警庶位。上慰留之。

延儒碩。御經筵。嚴選舉。明賞罰。重守令。簡將帥。

七月。召大同總兵定襄伯郭登還朝。

先是。登上疏曰。往者承平日久。人心驕逸。官無廉耻。惟肆貪婪。釀成汚濁之風。致有夷狄之禍。又曰。虜勢雖云請和。變態豈能預度。倘或渝盟。則大同一鎮。首先受敵。及今無事之時。若不早爲措置。一旦賊至。人似前日。手足無措。中國受侮已深。邊事豈容再壞。正欲大興屯田。以病召還。

禮部儀制司郎中章綸因災異條陳七事不報。

綸請下詔求致災之由。上崇撤樂減膳之敬。下推捐俸救荒之仁。節濫賜之費。罷雜補之俸。慎差遣之擾。備義倉。汰僧徒。諸事皆剴切。

命禮部侍郎鄒幹賑濟河南鳳陽等處大水。奏免本年稅糧。

八月。命兵科給事中鄭林操練團營軍士。

林既受命。遂以軒轅破蚩尤之陣教閱軍伍。具疏會圖以進。曰。臣通考古今陣法。莫有過于軒轅皇帝破蚩尤之陣。夫古之蚩尤。卽今之胡虜也。黃帝按井田作陣法。大軍歸中。專主旗鼓。八節旋繞。悉聽指揮。若正北受敵。

則東北西北二陣爲奇兵。張左右翼以援之。其正南正東正西及四隅受敵。亦如之。所謂常山之蛇。擊其首則尾應。擊其尾則首應。擊其中則首尾俱應者也。古之名將知此法者。惟太公望。孫武子。韓信。諸葛孔明。李靖。諸人而已。吳起以下莫能知也。其名之曰天地風雲龍虎鳥蛇八陣者。則諸葛孔明也。一大陣之中固有八陣。而小八陣之中亦各有八陣。大陣則法伏羲八卦。小陣則法文王六十四卦。所謂陣間乎陣。隊間乎隊者也。若夫造遁甲有九星。開八門。用三奇者。則又黃帝命風后爲之也。蓋聖人以神道設教。使人莫知其所以然也。大將居于玄武之位。而北嶽則常山蛇也。故曰常山蛇陣。林

時居兵科。見團營軍無統制。每出征。人馬多雜踏至死。劾其操練不如法。當國者遂請以事委之。林乃用此陣。教閱隊伍。始整其法。至今不廢。

北虜牧邊。巡撫宣府都御史李秉奏。廷議襲殺放邊。累上嘉納之。

廷議擊虜牧邊者。秉上疏。謂邊牆之外。皆夷狄牧放之地。彼未犯邊。若掩其不意而襲殺之。是倖功賞而放邊。累昔姚崇爲相。不賞邊功。亦此意耳。

巡撫河南右都御史王暹奏。開封等府水災。其遠運糧草。乞量派別州縣運納。從之。

命太監阮安治張秋決河。道卒。

安交趾人爲人清苦介潔善謀畫尤長于工作之事其修營北京城池九門兩宮三殿五府六部諸司公宇皆大著勞績平生所受賜予悉出私帑歸之官用不遺一毫蓋中官之不易得者。

順天府奏鄉試取中式舉人。

應天府奏鄉試取中式舉人羅崇嶽等二百五名。

海賊季福挾妖術惑衆作亂巡撫遼東都御史寇深捕首惡二十人械送京餘十人皆釋之。

北虜也先遣使來索報使不許。

大學士楊浩上疏請乘虜使未還出不意調遼東陝西諸路兵征討不許。

九月召丁憂王文起復。

貽書瓦剌可汗也先。

左都御史陳鑑致仕卒。

鑑吳人。先守陝西十餘年。有惠政。陝人尸祝之。

以蕭維禎羅通爲左右都御史。

十月。以左諭德徐有貞爲左僉都御史。遣治張秋決河。

先是河溢滎陽。自開封城北。經曹濮以入運河。至兗州。

沙灣之東隄大洪口而決。濟汶諸水皆從之入海。會通。

河遂淤。漕運艱阻。先後遣工書石璞侍郎王永和都御。

史王文相繼治之。皆績弗成。至是集廷臣議于文淵閣。

舉可以治水者。以有貞名上。有貞先名理。以倡南遷之。

議爲太監金英所鄙。遂累被薦不允。乃爲陳循推筭星命。侑以玉帶一束。謂循曰。理推公命。玉帶當至矣。故敢以獻。循納之。遂教之曰。汝當更名。無使內家習知。庶朝廷忘前議而薦可允也。乃更名有貞。至是遂舉治河。命右副都御史馬昂總督兩廣軍務兼理巡撫。

十一月。皇太子見濟卒。

虜寇遼東。

十二月。瓦剌諸酋並遣人貢馬。

甲戌。景泰五年正月。朔。上皇在南宮。

遣平江侯陳豫大學士江淵撫安山東河南。

積雪恒陰。詔求直言。

三月會試天下舉人。命兵部左侍郎兼學士商輅洗馬李紹主考。賜宴于禮部。

撤棘取中式舉人彭華等三百五十人。

巡撫陝西都御史耿九疇上疏諫下有司買羊角克燈費。命止之。

疏曰。昔宋神宗買浙燈。而蘇軾諫止之。此忠臣愛君之至情也。今買羊角製燈。無乃類是。書曰。不矜細行。終累大德。遂止。

三月。廷策會試中式舉人。賜孫賢徐溥徐轄進士及第。丘濬等一百二十九名進士出身。崔忠等二百一十七名同進士出身。

是科得丘濬何喬新耿裕鄧廷瓚楊瑄張寧俱爲名臣
順天河間民饑命刑部侍郎周瑄賑濟

二府素無蓄積又連遭大水乃條八事一裁省各處冗
官二停徵當歲糧草三添減軍士糧草如舊四免追欠
負馬騾牛羊五暫罷供應柴炭夫役六皇莊湖泊之利
恣民採取七招商中納鹽糧損其斗數八借水次官倉
之粟濟民事下戶部不能皆從而招商借粟之說尤以
爲難上聞詔特從瑄議瑄又議爲之具耕牛種子以便
于民時亢旱苗稿行部至武清懇告于上下神祇是夕
大雨

總督兩廣都御史馬昂生擒僞將軍周鐵盛盤馬蹄等陞

右都御史

選庶吉士丘濬等十八人。命右春坊大學士劉儼教之。
四月朔日食。

命禮部右侍郎鄒幹督易州廠薪炭。

新建隆福寺成。車駕擇日臨幸。有司夙駕除道。大學士
濟寧楊浩上疏諫止之。

浩言 陛下卽位之初。首幸大學。海內之士。聞風快觀。
今又棄儒術而重佛教。豈有聖明之主。事夷狄之鬼。而
可垂範後世者耶。

禮部儀制司郎中章綸上疏諫。幸大隆福寺。詔罷行。
綸言。佛者夷狄之教。非聖人之道。以萬乘之尊。而臨非

聖之地。史官書之。傳之萬世。有累聖德。

大學生西安姚顯上疏請自今凡內臣修葺寺院。悉行拆毀。以備倉廩之用。勿復興作。爲萬世法。不報。

顯言王振竭生民膏血。修大隆興寺。極爲壯麗。車駕不時臨幸。夫佛本夷狄之人。信之得禍。若梁武帝者。足爲前車之鑒。

築浙西捍海堤城。

貴州道監察御史鍾同上疏。請復儲。并陳一切弊政。不報。同嘗因待漏。與儀制郎中章綸期論易儲事。願獻狄梁公之誠。脫受比干之慘。無所憾。詞氣嚴正。繼之以泣。疏上。言宗社之本在儲位。宜復不宜緩。兼陳一切弊政。聞

者毛竦咸度事牢難破勢重莫移。黷其朝陽鳴鳳而危其手犯逆鱗。

巡撫河南右都御史王暹奉敕賑濟河南徐州饑民奏免開封等府縣五十一處夏稅之半從之。

五月下禮部儀制司郎中章綸及御史鍾同于獄錮之。

綸陳修德弭災十四事。一畏天戒二任燮理三養聖躬四節幸御五務儉約六勤論政七敦孝義八慎賞賚九重名爵十革巡撫十一擇重臣十二辯異端十三却貢獻十四汰冗官其畏天戒大意謂內官不可干外政佞臣不可假威福後宮不宜盛聲色凡爲陰盛之類請悉革罷其敦孝義則謂上聖皇太后皇太后爲天下母

受天下養可謂尊之至矣。然必躬修問安視膳之禮，乃盡尊養之誠。太上皇帝君臨天下十有四年，陛下向嘗親受冊封爲臣子，是天下之父也。至是以天位授陛下，尊爲太上皇，是天下至尊也。每月朔望及歲時節旦，宜率羣臣朝見于延安門，以極尊崇之道。而又復舊，皇后于中宮以正天下之母儀，復舊。皇儲于東宮以定天下之大本。如此則倫誼篤而和氣克，天意自回，災異弭矣。疏上，忤旨。下錦衣衛獄，刑逼誣引大臣并南宮通謀，拷掠慘酷，體無完膚。濱死者數卒，無一語及他。惟御史鍾同先嘗有言，故并逮之。俱欲重坐，會天大風雨，黃氣四塞，刑乃少緩。

除兵部辦事進士楊集爲六安州知州

集常熟人有書上于謙曰姦人黃玠進易儲之說以迎合上意本脫死之計耳公等國家柱石乃戀官僚之賞而不思所以善後乎脫章綸鍾同死杖下而公坐享崇高奈清議何謙以書示王文文曰書生不知朝廷法度然有膽氣當進一級處之遂出集爲六安知州進士選知州始此

謫發奸佞給事中徐正成鐵嶺衛

正吳江人密請召見便殿屏左右言今日臣民有望上皇復位者有望廢太子沂王嗣位者陛下不可不慮宜出沂王於所封沂州增高南城數尺伐去城邊高

樹宮門之鎖亦宜灌鐵。帝怒黜爲雲南衛經歷。復眷所淫者未行。乃謫戍。後復辟受凌遲。

御史高平言南城多樹。事叵測。遂盡伐之。

時盛夏。上皇嘗依樹涼息。及樹伐。得其故。懼甚。復位後。御史下詔。獄杖殺之。

南京大理寺少卿廖莊疏請問安。上皇并令。上皇之

子親近儒臣不報。

齊庶人賢。燦谷庶人斌。歟移置南京。

戶部尚書金濂卒。贈沐陽伯諡榮襄。

濂初爲御史。有聲。自永樂以來。巡按廣東者。滿載而歸。自濂去。一毫不取。廣人至今德之。在陝西臬司亦出色。

用是累陞副都御史邊儲賴以充足後歸京師奏對宏壯上偉之拜刑部尚書頗號深刻福建盜起遂叅軍務徃平之加太子太保遷戶部尚書然喜結權貴士林少之

六月加王文少保兼東閣大學士

改兵部侍郎李賢爲吏部右侍郎

七月敕儒臣纂修宋元綱目

倣朱熹例編纂上接資治通鑑綱目共爲一書

敕禮部纂修天下地理志禮部奏遣文學之士分詣天下蒐採

時修寰宇通志采事實凡例一准祝穆方輿勝覽祝氏

此書趙宋偏安之跡。未可爲法。況此書爲四六設。今欲成盛代混一之書。要須有資軍國。有益勸戒。如地圖道里。戶口之類。皆未可闕。必以永樂志書凡例。克益之可也。時亦有以戶口爲言。陳循執議不從。曰。此非黃冊。何用。戶口。後書成。竟以屢題狀元之名可厭。改之。

太子太保兵部尚書儀銘卒。

命僉都御史段信鎮守倒馬關。

八月。頒君鑑錄于羣臣。

吏部侍郎李賢進鑑古錄。領之。

賢擇君鑑錄中善可爲法者二十二君。擇其最切要者三四事。集爲鑑古錄。上之。奏言。前代聖賢之君。事跡浩

漫難於徧覽。今特錄堯舜而下二十二君。每君擇取所行之最善者數事。集爲一帙。臣於每段之後。略爲解說數句。欲陛下易於覽而行之。兼此二十二君之善而有之。則功德之隆。真比堯舜而光祖宗矣。帝閱此疏。問中官王誠等曰。此奏欲何爲。誠對曰。欲陛下學此數君耳。乃領之。

九月。命僉都御史陳泰治徐揚決河。

十月。巡撫四川副都御史羅綺以鄉人奏受番金。罷官籍其家。

命副都御史李賓巡撫順天永平。提督軍務。

十一月。巡撫河南右都御史王暹乞致仕。從之。

十二月以王恕爲揚州知府。

在府屢辯疑獄。歲饑。發廩不俟報。且給醫藥。多所全活。作資政書院。敎郡子弟。科不乏人。

謫福建巡按御史練綱爲邠州判官。再徙甘肅。經歷。

時福建官臺山民聚爲盜。綱聚兵捕其渠魁。而釋其脅從。於是與諸司相忤。按察使楊珏奏其縱盜。當道亦多忌綱。遂致遷謫。綱適遭父喪。自是遂不復出矣。

乙亥。景泰六年正月。

朔。上皇在南宮。

命太監班佑鎮守兩廣。

太監鎮守始此。嘗考洪武中。內官僅能識字。不知義理。永樂中。始令吏部聽選。敎官入內。敎書。正統初。太監王

振于內府開設書堂。選翰林檢討正字等官入教。于是內官多聰慧知文義者。然其時職專辦內府衙門事。出差者尚少。宣德間。差出頗多。然事完卽回。今則干預外政。如邊方鎮守京營掌兵經理內外倉場提督營造珠池銀礦市舶織染等事。無處無之。

總督兩廣右都御史馬昂征廣東瀧水獠賊。破之。陞左都御史。

獠賊趙音旺作亂。合諸山叛獠。大肆殺掠。民罹其害。昂乃調廣西狼兵及獠人同官軍直抵獠巢。斬獲甚衆。按瀧水羅傍獠賊自馬昂此年征後。天順初葉盛。成化初韓雍復一再征之。至今無復議征者。賊日益肆。夫今

邊臣猶議西復哈密。北復大寧東勝河套。今此瀧水羅
傍一帶。乃郡縣內地。距德慶州治僅隔一江。去梧州總
府不百里。爲兩廣往來咽喉。奈何坐視其暴劫吾民。阻
斷江面。爲肘腋之患而不恤。緣江南岍數百里。山林蒙
密。不敢毀傷其一草一木。朝廷設重鎮。置兵衛。果何用
也。禮部尚書霍韜嘗謂羅傍綠水之賊。爲害深矣。而有
司不肯議征。非不能征。不肯征也。若調狼兵。達舍并官
軍。分爲數道。一自鬱林入。一自高州入。一自新會入。一
自德慶瀧水入。四面並進。而梧州大兵上流振之。且縱
火赭其林木。使無所蔽伏。羅傍綠水之賊。反掌可平矣。
嗚呼。馬昂葉盛韓雍獨何人哉。

二月陝西耀州人爲妖言。守臣以反聞。逮捕二百餘人。巡撫都御史耿九疇申論。此本狂妄。無反情。悉以減死論。三月。太子太保吏部尚書王翱乞致仕。不允。詔有司起第于縣治之西。

時王直在部。選法一委于翱。翱洗剔垢弊。嚴考察。公銓注。抑倖進。杜請託。故事。吏典以資格出身。積久過冗。宣德間。命吏部引入內庭。會大臣羣考之。分三等。一等本格出身。二等雜職用。三等爲民。至是。翱以爲大拘。遂奏罷。仍依資格法。考于部。書判有一稍可者。皆在取列。故吏無虛勞之嘆。又以官吏給由起復。文憑過多。匿乃行。覆勘法。而奸人不得爲計。取選。故以硃書。下緣爲奸。糊

塗莫辨。翺易以墨弊遂絕。詔求賢良方正經明行修山林之士。駢肩而至。翺深惡而痛抑之。百不取一二。提督遼東軍務都御史寇深以母年九十有三乞終養。不允。

四月。朔。日食。

叅贊宣府軍務僉都御史李秉奏罷叅將孫安江福。薦都指揮周賢代安。指揮張林代福。從之。

命副都御史馬謹巡撫河南。

五月。山東旱蝗。巡撫尚書薛希璉經營賑貸。活饑民百八十餘萬口。

閏五月。

六月南京戶部尚書沈翼奏各衛選留操備運糧等項全占軍多有妨屯糧乞禁革其弊從之。

以宋儒朱熹裔孫挺爲翰林五經博士世襲

七月加督撫蘇松等處侍郎李敏爲戶部尚書專總督糧儲。

初大水淹浸田禾經久不退。會知府汪濬議當開濬白茆等塘以洩之。濬躬往常熟縣相視。時久不疏濬。壅成隄堰。近民耄倪皆卧泣堤上以求免。言一開濬。則堰下之田亦就浸矣。濬不強之。挑濬青墩浦橫歷塘共五六十里以通白茆塘。鑿開三堰。約三里餘。引水通鮎魚口。其海口淤塞。漫以葦蒿。仍挑去約千餘畝。於是水得歸。

海。

命副都御史鄒來學專巡撫應天等處。

時議改總儲與巡撫分設二員。

八月。杖南京大理寺少卿廖莊。及在獄儀制司郎中章綸。御史鍾同于闕。同死杖下。綸不死。仍禁錮。詔獄。謫莊定兗驛丞。

先是莊上疏勸上朝。上皇及加恩沂王。忤旨。至是莊以母喪赴京。關給勘合。陛見。上命錦衣衛拿在午門外。着實杖八十。并拿綸同。各杖一百。

巡撫江西都御史韓雍薦吉安知府張瑄。撫州知府王宇政績于朝。下吏部記之。

吉安民素號健訟。日不下數十百人。瑄決斷如流。且屢辯疑獄。痛革吏弊。發奸摘伏如神。吉民畏服。然吉俗信鬼。歲刻木以像神。具冠裳。聚衆迎送。以徼福澤。力禁之。弗聽。出遇諸途。遂叱令棄像水中。民首倡者悉寘諸法。無何。遭重疾。郡之長老皆曰。神爲祟也。請復之。瑄執弗許。病亦尋痊。郡民給路引者。前例每引取銀四分。謂之堂食。前守悉爲已。有乃遵舊制。祇取楮幣一貫。仍爲公費。丙子夏。郡大饑。具申上司。不候報。輒發倉廩以賑。民賴存活者多。郡學諸生有墮乏者。輒分俸給之。若彭教羅倫。曾彥輩。皆魁科甲。爲名宦。實所造就者也。僚屬庶而貧者。家有婚喪。皆設法以助之。又建閣于學。以藏御

書建祠于郡以祀忠節文廟府治橋梁道路皆修治完
整公私一新

撫州郡地險民夥素號難治宇至則以簡靜御之六事
畢舉里有隱士吳與弼不妄至城府往造其廬與弼聞
之卽先謁拜談論竟日出嘆曰真明府也宇益勞心民
事凡漁利害民宿弊盡革罷之吏有奸黠盜府金自若
廉得其狀置之于法衆皆畏服撫民多商給繻之錢歲
計累萬守皆自取以爲常然宇曰可以無取而取之是
傷廉也悉屬于郡治有穴地前守引水蓄魚以自給遂
實之爲倉儲粟數萬石以濟饑民郡人題其壁曰關節
一毫無地入公廉兩字有天知遠邇傳誦宜黃多山有

虎爲患爲告神而驅之虎皆遁去金谿有衆聚暴掠者
宇曰此吾良民迫于饑餒故耳卽開倉濟之衆皆感泣
曰真吾父母也卽時散去

九月巡撫都御史耿九疇言乞委邊將衛民以止移入不
能衛者論罪從之

初邊民春夏就耕秋作移入具疏言邊將所以禦寇而
衛民也今民自避寇而失恒產將何爲哉疏下民皆稱
便

十月順天府尹王賢以九年考滿乞致仕不許陞正二品
俸復任

賢宅心公恕待人不欺非義分毫無所取在任以當務

爲急嘗修府治學校及宋文丞相祠事集而民不擾苟有可省卽省惟恐累于民故民德之深

山西布政使陳昱奏民饑乞蠲逋稅十餘萬石從之

南京戶部尚書沈翼奏江西司歲辦商稅等鈔乞差御史同部官拘集舖行照依時值平估填勘合行庫放支給還物主不許乘機作弊從之

十一月南京國子監祭酒吳節奏成賢街舊有號舍六十六間年久荒廢乞行南京工部體勘改建復字號以居監生從之

十二月鎮撫大同副都御史年富丁父憂懇乞終制不允

丙子景泰七年正月

朔 上皇在南宮

少保于謙以病在告遣太監興安舒良視之。

謙以國家多事窮年不還私第。居止朝房。留一養子自侍。至是以疾在告。興安舒良奉旨更番來視。見謙自奉過儉。因以上聞。輟尚膳醢醬蔬菜之屬賜之。駕幸萬歲山。伐竹爲瀝。畀謙和藥。諸臣言寵用過重。興安曰。謙日夜與國家分憂。不問家計。朝廷正要此等之人。今要再尋一個來換于謙。恐未使得。衆皆默然。

調工部尚書石璞爲兵部尚書。以直內閣太子少師江淵爲工部尚書。

時于謙病在告。朝廷欲得二人協掌兵部。淵在內閣。與同官不相能。欲求出補兵部。王文與商輅密擬內批。

調璞於兵部而以淵代璞。淵不之知。明日旨出。淵大恚失望。

二月詔定南北直隸及各布政司鄉試取士額數。

累朝取士原無定額。應天如洪武之丙子。永樂之乙酉。辛卯俱三百名。江西如永樂之甲午等科俱二百名。可考也。至景泰庚午以來各處增數過濫。如順天景泰庚午。癸酉則二百二十五名。應天景泰庚午則二百名。癸酉則二百五名。至是裁定兩京各一百三十五名。內三十名取監生。五名取雜行。江西九十五名。浙江福建皆九十名。湖廣八十五名。河南則八十名。山東廣東各七十五名。四川則七十名。陝西山西各六十五名。廣西五

十五名雲南三十名

三月少保兵部尚書于謙奏遣石彪克遊擊將軍成大同

時總兵石亨素貪縱爲謙裁抑其侄彪又驍將慮其一門同握京兵故奏遣之亨彪皆切齒于謙

太子少傅吏部左侍郎俞山懇請致仕命馳驛以歸

巡撫盧鳳淮揚等處都御史王竑陳致治保邦二十事不報

其言指斥權貴權貴陰中傷之

御史閻鼎請令在京堂上官并給事中御史在外責之巡撫巡按有不行推訪及舉主徇私濫舉者罪之吏部以聞

從之。

四月僉都御史徐有貞築塞沙灣堤成

初沙灣堤決鑿道阻絕詔朝堂舉能治者有貞請行上
疏平水土在知天時地利人事天時旣經地利旣繙人
事乃究夫水之性可順以道不可途以湮禹之行水用
茲理耳方今治者徃徃反是治所爲難臣循覈河理自
雍而豫出險固之平夷勢已濫肆又由豫而兗土益疏
水益肆而沙灣大洪口適當其衝於是決焉而奪濟汶
入海之路以去諸水從之以泄隄以潰渠以淤潦則溢
旱則涸此漕運所爲阻者然欲聚而湮則有不可故潰
盆潰淤盆淤莫之救定反成澤池臣今措畫惟宜首疏

水勢勢平乃治其決決止乃濬其淤因繼爲方以時節
宣俾其後亡溢涸之患法必如是當可有成詔有貞自
用乃作壩埽牐渠隨宜先後之牐以制水渠以分水渠
起金隄張秋之首踰百里至于大瀦之潭越范暨濮又
上數百里經澶淵以接河沁用平水勢勢隨平命渠曰
廣濟牐曰通源渠有分合牐有上下凡河流傍出不順
者堰之堰有九長袤皆萬丈於是水不東衝沙灣更北
出濟漕河治旣成緒乃作大堰其上楫以水門繚以虹
隄堰之崇三十有六尺其厚十之長百之門廣三十有
六尺厚倍之隄之厚如門崇如堰而長倍之用平水性
性亦平乃濬漕渠至數百里復作牐于龍灣魏灣凡八

積水過丈則泄之。都通古河以入于海。又以金水子母之義。沈玄金爲物象。幾萬斤。鎮定焉。及三年而功成。始治者有發京軍疏河之議。奏蠲濱河民馬牧庸調。專役河防。省兵費。紓民力。方工時。或阻于上。以工人部聚衆。挾兵勞苦。將有他變。上下其言于有貞。乃條布釋上疑。上悟。不問前後勞。諭數四。委倚不移。凡水工之就。皆以。上專信力也。

五月。寰宇通志成。

進陳循。率益殿大學士高穀。王文並謹身殿大學士蕭鎡。戶部尚書商輅。兼太常寺卿倪謙。呂原。左右春坊大學士。劉儼。進太常寺少卿。兼侍讀李紹。林文爲左右庶

子兼侍講。餘各陞賞有差。

以宋儒周惇頤、孫冕、世襲翰林五經博士。

六月，兵部侍郎王偉密奏少保于謙過誤。上以偉奏示謙，以勿憾諭之。

謙見偉密奏，叩頭認罪。上曰：「吾自知卿，卿勿憾也。」謙既出，偉下堂迎問曰：「今日聖諭爲某事？」謙曰：「姑入語之。」既入，復請乃笑曰：「老夫不是處，賢弟當面言之，未敢不從也。何忍至此？」乃出奏示之。偉惶愧，跼蹐無地。

禮部尚書胡濙以年八十二，因災異乞罷，不允。

七月，提督遼東軍務都御史寇深乞歸省其母，許之。

時深母年九十有四，已感風疾。曰：「吾得見吾兒，卽瞑目。」

矣。深悲泣懇求歸省。至家。母一視而逝。深哀毀踰禮。命洗馬柯潛修撰劉珣主考應天鄉試。

舟泊淮揚。有舉子鬻私者。暮夜投潛。潛叱之。彼固以請。以所賂遺至。潛前潛怒。命執付有司治以罪。

八月。命太常寺少卿劉儼編修黃諫主考順天鄉試。賜宴于順天府。

南京禮部尚書張惠奏。監生省祭不必拘其已經幾次。但歷事期近。存留聽撥。從之。

以僉都御史徐有貞治河有功。陞左副都御史。

順天府奏鄉試取中式舉人徐泰等一百三十五名。

巡撫蘇松都御史陳泰均賦額從之。

泰知前免租之詔恩未得均有富室田多墾闢其重者多在貧下乃推廣調停之令以五升之田倍其賦而官田之重止取正額於是澤始均而賦額不損上下咸便富者亦不怨矣

大學士陳循王文奏許順天考試官劉儼黃諫閱卷不公監試御史林鶚有通同情弊以大學士高穀申救命覆閱試卷皆如格釋之

時內閣陳循子英王文子倫入試俱不中式循等論奏儼諫二人閱卷不公許監試御史林鶚同邑林挺亦在中列且摘策題有無正統等語以激帝怒請如洪武間罪劉三吾等例重開科考試上令翰林院覆閱取

中式卷高穀懼儼等禍且不測欲爲申救早朝奏事畢出班跪稱臣高穀有言因召至榻前具白其情且曰大臣子與寒士並進已不可況又不安于命欲構考官可乎由是儼等得釋。

賜大學士陳循子英王文子倫爲舉人許會試。

禮科給事中張寧劾大學士陳循王文私其子爲暴才稱屈失大臣體難居內閣乞罷黜不報。

應天府奏鄉試取中式舉人吳啟等一百三十五名。

九月湖廣苗酋叛命兵部尚書石璞率兵討之。

奸民李玠魏玄冲引酋作亂徃爲向道引之寇掠作讖文以誑湖湘諸不逞者從而和之民用大擾命璞提軍

往剿璞以計生擒琚玄冲。檻送京師。苗平還治部事。
十月。巡撫河南左副都御史馬謹奏。敕覈所屬官吏。凡貪
無狀者悉黜之。

十一月。以總督兩廣軍務右都御史馬昂征斗峒賊有功。
陞左都御史。仍總督軍務。

十二月。削寧府護衛。

自寧獻王在永樂至宣德間。已恣橫犯分。因宣皇答
書切責。稍斂戢。托志神僊。正統十三年卒。子盤斌未嗣。
卒。孫奠培嗣王。坐不法事革護衛。

十二卷終